

澹

靜

齋

詩

鈔

澹靜齋詩鈔卷之二

閩中 海峯 龔景瀚

雙驂亭草

寄懷滇南遲持齋先生

我行萬里路惟見一人歸白髮猶耽酒青山獨掩扉

書成國語

持齋日  
失明

感事咏金微袞袞諸年少空憐知者

稀

送允振七姪入滇

匹馬蕭蕭再入滇回思往事倍淒然平生作客終何益  
萬里依人亦可憐骨肉關心同一本艱難隨我已三年

相逢他日知誰健雨淚紛紛灑別筵  
七姪幼客他鄉余遭大故同奔弄者

三年近始自滇歸數月復出

### 延陵篇爲節孝李母作

延陵有靜女少小溪閨處十一精女紅十三弄毫楮十八初結褵入門奉藥糜可憐繾綣日翻作別離時別離不復見腸斷雙飛燕十年貞女心一月夫君面長跪問夫君哽咽語不聞病眸數回首枯淚猶紛紛紛紛淚漬帛妾死知不惜却念堂上翁蕭蕭雙鬢白鬢白形影單子死婦承歡吞聲猶掩泣強笑勸加餐加餐轉愁絕甘旨何從設綿綿機上絲點點眼中血淚眼望孤兒孤兒

長大遲自從解言語一一教聲詩聲詩法初究經史還  
親授風雨一燈寒伶仃雙影瘦對影轉心悲人偁母作  
師汝無忘死父我願有佳兒佳兒方鵲起含笑今當死  
三十八年心九原見夫子相見無盡期誰言長別離試  
望高墳上還生連理枝

送鄭二存敦之漳南

貧交易爲別歲月苦蹉跎酌酒送君去含情奈遠何依  
人終失計知己已無多莫惜雙鱗使時時慰寤歌

我亦輕餘子君能守六經對人雙眼白展卷一燈青曲  
學終阿世斯文有典型蛾眉苦謠諑好自惜娉婷

時蔣  
觀察

招君入署排簪羣經同  
事者非其人也故戒之

題某小照

我昔遊兮洞庭湘水綠兮君山青波平兮木脫風慘慘  
兮雲冥冥天蒼茫兮月欲墮哀鴻嘹唳兮不可以聽紛  
身世兮多感恩美人兮涕零况年來兮蕭索披斯圖兮  
如昨若有人兮山阿羌何爲兮獨樂林寂寂兮無人局  
有棋兮不著落葉響兮空山飛鳥翔兮寥廓想得意兮  
忘言聊置身兮邱壑彼騷人兮多窮悲玉露兮哀青楓  
情所遷兮境變長惻愴兮秋風君何修兮得此樂莫樂  
兮山之中古人不作兮誰與同欲裹糧兮君從峯迴路

繞兮杳不知其幾重中有天地兮不與世通徒撫卷兮  
太息永慨想兮高蹤

壽學使吉渭崖太僕

北固金山寺南徐鐵甕城扶輿孕清淑卓犖挺奇英家  
本崔盧舊人傳李杜名衣冠唐宰相禮樂魯諸生初肄  
成均雅旋遷禁苑鶯讀書在東觀橐筆入西清柏府羣  
烏集梧岡一鳳鳴 聖猶資啓沃民已望公卿黃屋尊  
經術青宮念老成二疏方解組三輔遂持衡籍甚張京  
珥何如李北平管弦聞夜誦牛犢試春耕勢有升沈異  
心無寵辱驚命官周伯冏奉職漢滕嬰 帝念閩中士

公爲使者行水壺初貯月鐵網已張絃授法金針度量  
才玉尺程醫師收乳石匠氏集桼楹賤子慚初學先  
君忝舊盟六堂同事日三載故人情今昔悲何極雲泥  
迹已更通家曾附驥向若欲登瀛况復逢初度遙同進  
一觥作人宜壽考久照自文明樗李浮春色膠庠啓頌  
聲袞衣畱未得當宁待和羹

孟考功瓶菴招同曉樓樾亭醇叔三林君小集固  
菴各和東坡先生岐亭詩余以事未與考功末  
章謬相推許且邀余和作此應之久疎筆硯以  
此續諸君之後愧可知也

素性樂友朋渴如蠅赴汗同類固相從水火就燥濕年

來各雲散舊遊杳難得死別常吞聲

謂林太史香海

生別亦何

急

懋亭醇叔皆有遠行

伯勞與飛燕不及呼羣鳴嗟哉卓犖人困

此塵網羃饑驅事奔走魚勞尾已赤猶受鬼揶揄逢人  
雙眼白誰與飲君酒落落脫冠幘胸塊各槎枒酒闌互  
歌泣不惜玉山頽唾壺擊復缺屈指十年間久無此主  
客吾來亦何晚不與此勝集

壁上何煌煌淋漓翻墨汁更闌秉燭觀隱起痕猶濕諸  
君皆健者放筆吐所得各建大將旗鏜然鼓聲急戰陣  
走龍蛇軍聲亂鵝鴨東坡有舊壘偏師闖其羃遂令趙



壁中忽見漢幟赤頗聞玉局老地下痛莫白死去五百  
年擗摺衣與幘又疑固巷中夜有神鬼泣渾沌劃然開  
誰爲補其缺曉樓獨何爲默默作逋客願將朱虛法例

彼蘭亭集

曉樓詩未  
成故戲之

京洛多貴人素衣染杼汁胡不入江湖陸魚响以濕先  
生早入官朗性有真得不作黑頭公翩然歸計急藥圃  
課栽花池欄看鬪鴨洗腆奉高堂清尊啓巾幘萊衣效  
兒戲頭白心猶赤萬鍾爾何加陔藝真潔白卽今年半  
百髮禿不任幘却咏陟岵詩猶作孺子泣我亦傷心人  
經庭養已缺繼此知何如前途猶過客努力事慈闈勿

爲百憂集

晉代尙曠達莊老啜殘汁嫌彼禮法士操持如束濕放  
縱敢大言汪洋竟奚得浸尋至永嘉其禍亦已急買櫝  
而還珠賤雞而貴鴨柱下五千言元關久已纂先生守  
清靜不奪如丹赤已廢口雌黃猶持論堅白名教樂有  
餘豈必去衣幘所貴守其身勿作練絲泣皜皜者易污  
嶢嶢者易缺常以退爲進猶如王作客浚林鳥所歸下  
地水所集

哦詩如割漆戛戛出少汗所潤曾幾何涓滴僅能濕三  
年謝筆硯藏刀計亦得先生不諒人宣索一何急遂使

楚龔生翻作杜荀鳴磬牙苦推敲浚思挾蒙纂詩成不  
敢宣欲書面先赤譬如施繪事配儷青與白又如塑禹  
人略具衣與幘龐然亦成形所乏者歌泣誹諧或有資  
風雅道已缺先生今盟主領袖騷壇客士俗如可醫願  
見襄陽集

時將請讀  
考功素作

集樾亭齋卽事用孟考功瓶菴見示新詩韻

離情宛宛舉杯遲怕見津亭折柳枝

余與樾亭  
皆將出行

遣悶難

如原上草閱人多似道旁碑十年舊雨同萍梗幾日新  
愁上鬢絲賴有良朋謀一醉興酣試爲畫榴皮

南朝才子數邱遲玉樹凋傷泣故枝何日一坏封馬鬣

空餘雙淚灑羊碑飄零誰進王孫飯哀怨猶聞寡女絲  
卅載知交應不乏何妨一腋集千皮

鄉前輩吳劍虹先生至今未葬嗣孫

早死孫婦陳守志撫孤貧不能自存  
座間語及此因爲募疏告之同人

亦園亭白桃花疊前韻應瓶菴命

春事今年覺稍遲白桃花放兩三枝前身合在蕃釐觀  
小字應題幼婦碑玉體橫陳月皎皎黛睂斜襯柳絲絲  
煩君爲買胭脂染世土由來相以皮

玉梅早謝牡丹遲畱伴仙郎此數枝笑靨依稀逢息國  
手痕仿佛認唐碑窺人粉面餘珠淚映肉冰綃是藕絲  
只恐東風能作惡膽瓶斜插對烏皮

考偽閩永隆石塔碑記畢題其後疊前韻

咫尺人心悔已遲

王曦以酒屬朱文進連重遇咏白香山詩惟有人心相對間咫尺之情不能料句朱連

由此疑懼

烏飛繞樹竟無枝九原長痛宣陵誓

王延政令

女奴牙將持誓書香爐與曦誓于宣陵宣陵王審知墓也

千載猶傳石塔碑當日堂

廉如厝火盈庭傀儡盡牽絲

碑中列公侯將相凡數十人距朱連之變僅三月日

室憐強諫陳光遜不向烟波學子皮

光遜為曦翰林學士以直諫為曦所

殺

好古還愁得見遲朝朝蠟屐共筇枝摩抄宜入歐陽錄

寢處如看索靖碑

子同機亭以考是碑登塔者數次

霸業銷沈同雁爪

遺文瑣綴尙蛛絲自慚考索猶多誤不學祇堪號視皮

醉中放言寄林樾亭疊前韻

青山是處可棲遲  
漫道鷓鴣借一枝  
生計蕭條餘馬壁  
文章兒戲學雞碑  
君除東野須開口  
我繡平原欲買絲  
莫與世情同嗜好  
空教笑面似靴皮

秉燭行遊尙未遲  
長攜樽酒對花枝  
生前不著東山屐  
死後空沈漢水碑  
敢謂風流追畢卓  
但拌日飲作袁絲  
君看愚智終同盡  
任說羊皮與虎皮

宿何述善齋晨雨未歸  
遍觀書畫因得見宋文文  
山先生所藏琴述義爲鼓數曲疊前韻

良夜談晝起遲忽看涼雨  
滴松枝宣和教王留遺墨

壁掛宋徽宗御鷹東武王族有斷碑殘碑一紙諸金石家皆不著錄子以三國志考之知

為魏東武侯王基墓誌勝事當為十口飲述善方高情更付七條

絲摩抄五百餘年物錯認蛇斑是薛皮琴以蛇皮斷者為古

前聲掩抑後聲遲淒切如聞唱竹枝寂寂松風泉出澗

濛濛雲氣雨昏碑升沈往事驚蕉鹿哀樂中年寄竹絲

海上成連多學者誰如道訓得吾皮述善自言戚友多來受琴法者

作詩未竟室人來告薪米絕矣戲拈二律示之疊

前韻

突烟不起午炊遲樹底呼童拾敗枝換米未成居士屨

生金安得潁陽碑好邀朋輩來餐黍歲用東坡穆父事羞遣妻

兒去乞絲尚有屢屢供一爨君看當日五羊皮

寂歷空齋晝漏遲閉門長對竹千枝未甘乞米書新帖

且共烹茶讀古碑

趙明誠事

室有藏書皆錦帙匣留名硯是

紅絲好將萬卷撐腸腹勝似三條束肚皮

樾亭答詩語及香海讀之悵然有作疊前韻

一官匏繫乞身遲越鳥還應戀故枝

前年六月間香海來書歸志甚決未

幾死

燦燦尺書猶在袖離離墓草已侵碑同人共句藜

頭火使節曾封閣上絲

香海曾充永樂大典纂修並典甲午浙江試事

寂寞聲

名身後事可憐文豹只留皮

曲江遊宴醉歸遲楊柳春風萬萬枝

香海與余同成進士玳瑁筵



中白玉瑄芙蓉城裏碧雲碑祇今憔悴聞隣笛憶昔綢繆贈素絲獨抱遺編再三歎故人淚滴石榴皮

呈瓶菴兼簡令嗣景明疊前韻

廿載馨萼一見遲梧桐高竦本無枝百金人購香山集千兩車看太學碑前輩風流巾折角彼都人士帶伊絲雲龍許我輕追逐蒼壁何曾等鹿皮

郎君清質鳳威遲昔向娑羅借一枝舍衛國中聞佛語頭陀寺裏讀王碑生天久已空諸果食肉何緣掛寸絲

景明好佛而食未  
能廢肉故嘲之  
料得詩文猶結習豈徒經咒寫楞皮  
機亭以詩索景明和章  
數月未答故以此速之

奉酬瓶菴見答之作疊前韻

萬里歸來化鶴遲，泉魚長自痛風枝。

來詩首章爲先君子作

忍聞

常侍山陽賦，重說羅池刺史碑。

詩中及先君子墓誌中語

廿載神

交情似漆，孤兒腸斷淚如絲。雙驂亭上門羅雀，父黨猶

能造叔皮。

毛義家貧，捧檄遲承歡，無計慰萱枝。當年未受山陰謫，

此日空傳峴首碑。

來詩有新硯將試子牽絲句

脫穎幾曾偁利器，奏

刀漫說理琴絲。品題忽爾增聲價，羊質於今冒虎皮。

集井上草堂瓶菴以事先返同樾亭，憲光介堂昆

弟夜飲醉歸，成三詩呈諸君子，并乞和章。

有山豈必偁岑岳有水豈必施舟帆一邱一壑亦佳耳

嗜好固已殊酸醎處安先生昔高士倦游歸築嵩山巖

草堂爲黃處安先生故居在嵩山麓當門古井泉潯沸井爲宋提刑蘇才翁所鑿堂以此名

繞屋綠竹枝筍摻遺詩幾卷人猶讀草堂數字手自劖

題匾爲處安手書星移物換一轉眼存亡誰復辨荆凡空餘名

題牛氏石不見曙倚鄭南杉主人好事繼前輩與我神

契期至誠良朋止可邀三四樂事聊復親杯棾杏花婉

孌柳絲軟春風策策吹輕衫洞門草長不容入誰以一

丸泥封函却循橋右登曲嶺苔滑路細石空嵌危臺一

望曠極目故人墨跡嗟梅臧壁有林醇叔題字千山樓觀起天

半烏石旖旎拖風縵我生適意在山水對此無異攀巖  
嶮有如屠門未得肉大嚼亦足快老饒却愁歲月去如  
駛鬢邊疎髮非髟髟騎牛未能吹短笛刷藥何日腰長  
鑊行蹤如萍泛不定憂思似草繁難芟且將餘年付樽  
罍更嘗奇味及蛤蜊時盤中多海錯葡萄斗酒亦不惡西涼刺  
史徒虛銜忘形欲返客為主苛政盡去史與監太白已  
傾伯仲雅微星漸沒東西咸酒闌燭灺僮僕睡却聞醉  
語猶喃喃時平能容汝豪縱口直終畏人譏讒離黃月  
旦古所戒不見周盾銘三臧醉中與樾亭縱談人物醒而悔之  
世人迂疎窳似我十年奔奔計誠左何如到處但偷閒

竿木隨身無不可我前量不勝蕉葉一杯兩杯今亦頗

樾亭終是不羈人醉舌爛翻如炙輾鄭君醇淑含天真

時露英姿更磊砢憲三何落落各有得仲者玉立瘦而

橢述長君一往情自淡新詩句句悲坎軻述少君豪氣

猶未除拍掌一笑冠爲墮介襄陽先生獨飄然瓶來何

濡遲去何果亦園亭畔西廡屋此時倚壁方危坐南皮

高韻編初成瓶菴集皮字韻倡和詩爲所得新詩今已夥

何爲苦吟不肯休太瘦他時驚飯顆

先生筆力龍文扛林君繼響洪鐘撞一時登壇執牛耳

桓桓晉楚皆大邦我虱其間如鄭衛力雖已竭心未降

背城猶欲借其一命中敢云壘必雙吾聞兵法先制人意所不備神爲懷吳師茶火晨壓陣越甲組練宵浮江致師聊以固吾圉量力未可輕愚憊兩軍相見壁壘變請君礪刃鍛矛鏃

文信國古琴歌次林樾亭韻

琴今藏何氏有公自題詩云松風一榻雨

蕭蕭萬里封疆不寂寥獨坐瑤琴遺世慮君恩猶恐壯懷消景炎元年月日文某題於青原寺

孟曰取義孔成仁兩者合作文山身斯人能使琴千古不然枯木安足珍公之精誠在此木萬劫不肯隨灰塵聲哀令我感忠義調古與汝和韶鈞劉越石笳夜奏羯高漸離筑西擊秦精忠大節同不朽不惟其器惟其人

流落人間七百載幾見桑田變滄海背題猶識景炎年  
有元陵闕今安在淒涼古寺思君恩忼慨新詩泣真宰  
此琴不壞此詩存宗社至今如未改君看何氏蒼壁齋  
夜夜奇光成五彩嗚呼古今恨事何其多天不可問壁  
徙呵宏範大書紀滅宋厓山百尺崖可磨北軍歡呼還  
奏凱日日美酒浮青螺獨有孤臣灑血淚中天回首悲  
滹沱文山被囚過滹沱河有  
回首中天感慨多之句未能手劒斬寢炎猶聞正  
諸折博羅黃冠歸鄉復號召壯懷雖在如天何我讀公  
詩三太息蕭蕭夜雨松風利不須更擊竹如意已是荆  
卿易水歌

去歲得心虛肝弦之疾陳君卓爲謂勞思所致宜  
屏筆墨以養真氣今春稍瘳而結習未除疾輒  
間作君爲製方兼惠良藥賦詩三章誌謝用前  
集井上草堂韻

我不能遊戲人間如呂嵒又不能蓬萊萬里飛仙帆昂  
藏七尺困邊海日飽囊粟壓腥醢蠹魚生死在文字硯  
田磨盡千端巖韓蘇李杜嗟已遠力薄猶欲裾相摻冥  
搜造化出幽險日日肝腎愁彫劓文名未成奇疾作狀  
不能名請舉凡大略皮存膏液盡有如深壑枯松杉山  
妻漫復慰王章慈母獨能哀畢誠爲焚筆視謝朋輩長



親藥餌辭樽榼今春頗覺身手健偶尋花事嬉春衫口

盟漸已忘息壤文戰遂欲爭殺面雲委波詭鬪奇怪字

彫句琢搜穹嵌枯腸敝漏餘并鮒縵面鰲黑同釜臧左

肋弦急鶴啄粟自得疾後左乳下有筋中心怦動風搖

繆心虛作惡日夜必以手按或屈身偃僂始帖然家人相見怪我瘦徒畱玉骨

肩嶢嶢我猶倔強自慰藉吾舌無恙食尙饒陳君玉立

仙之癯顙高目炯長脣影讀書餘暇及方術爲我採藥

親持鏡言我所患在根本精神宜憂思宜芟觀心泛如

不繫舟逆氣滯如閉口蟻內功旣完外功起然後琴水

和人銜奈何技癯不自禁縱意無復立之監後將噬臍

悔何及空懷椒糈要巫咸勿再苦思嘔肝肺或可微吟  
學咕喃良言逆耳藥苦口亦如得道資謗讒我拜斯言  
感厚意何以報之詩一緘

久病我亦復知我方書在右藥爐左丹砂黑汞尙非宜  
緩補其陰理則可地黃爲君尤爲臣茯苓當歸性亦頗  
疏其脈絡同導川潤以膏脂如灌輶選擇尤宜炮炙良  
燥烈急屏金石礪吾方已定尙遲疑求全猶恐壁有櫝  
難經本草讀不熟聞其略也然而軻陳君學業有真傳  
張劉朱李瀾未墮倉公已飲上池水見一方人斲之巢  
琴陀肯爲元龍畱安常常共東坡坐新方簡切只數味

兵甯貴精不貴夥藥成何似九轉丹驚看堆盤千萬顆  
強力不憚萬鈞扛大鳴小鳴鐘應撞吾聞醫人如醫國  
補技亦可施危邦刀圭入口疾良已坎離既濟心則降  
君有恆言願人壽君有願人壽三字圖章吁嗟此術今無雙我雖  
賴君幸不死前事不忘心爲懷况復離家遠于役襁被  
行渡烏龍江時將有永定之行此詩出口不敢再買癡但可學  
駉蠢謹守君言作韋佩慎勿以身試戈鋌

澹靜齋詩鈔卷之三

閩中 海峯 龔景瀚

棲鳳草

洛陽橋

十里長橋挂採虹征帆葉葉下東風永嘉南渡人何在

猶有青山似洛中

永嘉南渡衣冠多寓於此地以是名始有故鄉之思乎而士山曼衍風起

沙飛港汊縱橫水光樹色亦酷似邛山洛口一帶風景也橋創自宋名萬安後人復以地名名之曰

夜雨有懷小范家兄觸緒紛紜遂至滿紙

空階一夕雨滴滴愁入目中宵不能寐感歎時坐起我有同懷兄迢迢隔千里久不見書來肥瘦今何似閩都

消息斷况乃深山裏寢魂懶不飛望望湘江水

世路方險巇小官亦不易君懷如朗月那復習側媚低  
睂奉上官踖蹢心如醉挂冠亦何難卅口爲君累况復  
念 慈闈安敢告憔悴忍飢事奔走睡面受罵詈努力  
勿復言素位亦吾義所貴守清白無忝 先人志尤宜  
慎其儀超然脫禍忌

昔我離家日 慈母晨先起送我出門屏涓涓淚如洗  
貧家聚常難此行非得已未敢牽子裾但悲命蹇爾斯  
言不忍聞所愧爲人子東鄰服費回洗腆羅甘旨西鄰  
力田農團圞樂菽水讀書三十年蹉跎竟至此白髮已

盈頭河清其可俟

青山千萬重孤城入釜底濕雲何濛濛十日雨不止空  
齋無人來時復親文史欲作寄家書沈吟對空紙 高  
堂頗健飯未審安步履余來時頗苦脚痛遙知寢魂中耿耿我  
與爾稚孫解語笑或使 慈顏喜羣兒讀琅琅亦足娛  
暮齒却愁箱篋空何以供滄漚嗷嗷三十口垂老憂薪  
米此來亦何爲憮然推案起

卽事

山邑瘠而僻古不通舟車我來當四月斗米三百餘中  
家力已殫貧者將何如有司急民隱力請開倉儲惻然

語衆民爲我待須臾茲邑距大府迢迢千里途大吏坐  
堂皇幕客省文書市區例供應朝夕進所需價廉米又  
鑿反斥斯言誣有司默無策束手徒嗟吁貧民不敢怨  
忍飢對妻孥新禾登尙早粒米真如珠矯詔賑河內吾  
思汲長孺玉篇而朱切  
義與去聲同

五月初十夜月

久雨晴哉佳况復見新月沈寥山氣清浩蕩天宇闊流  
輝切素壁濕影散林樾涼生修竹淨光入空階滑草葉  
垂細珠晶瑩如可掇花苗搖晴風乙乙生機活行吟答  
清響小酌傾新醪翻思昨夜雨使我中懷怛悲樂亦何

常吾心固未逢

衙齋讌集卽事簡吳明府

君不見山公騎馬遊習池花下倒著白接羅酩酊三百  
六十日大隄猶唱襄陽兒又不見芙蓉城王石曼卿天  
下耳熱三豪名詩人梅老釋惟儼日與杯鐏同死生人  
生適意須行樂富貴神仙兩寂寞斥鷃蒼蠅笑不休一  
雁高飛入寥廓延陵才子今循吏訟庭草長日無事時  
呼明月下芳樽更遣花枝爲舞伎座中賓客皆賢豪激  
昂意氣排風騷清風初來微雨歇舉杯一笑天爲高解  
衣露頂觥籌錯豪竹哀絲間諧謔百壺清酒進如泉玉



漏沈沈山月落月光燈影交模糊坐者倚壁行者扶眼中已不辨爾我耳內時復聞歌呼我雖杯斚不入口次公醒狂奚必酒感君豪氣爲君歌擊碎唾壺還擊缶平生頗薄章句儒亦不希蹤嵇阮從不夷不惠從所好一觴一咏聊自娛十年足跡滿天下白眼長遭俗子罵却憐萬里空歸來仰天長嘯誰知者卽今飄泊山城裏僞作經師亦偶爾長對先生肯齧盤猶愁方朔長安米時定米甚昂賴有主人能好客落落襟期遙不隔今宵懷故歲及之抱爲君開應許臣髡醉一石却愁醉去玉山頽睡眼朦朧對酒杯步隨月影且歸去明日思君倘復來

花栽爲草所蔽呼童去之口占對草

種花苦不長衆草何離離引蔓紛膠輻不受雨露滋呼  
童祛荒穢一一理其枝物各含生意吾心豈有私所貴  
在得所此地非爾宜前庭多隙土古道臨清池蕃蕪不  
汝禁青青亦可怡行矣慎自愛爾才爾自知

階前栽菊數本連日大雨水漬將萎矣哀其美才  
未成而驟遭毀折也作

眾卉各欣欣爾生獨不遂積水爛其根枝葉日憔悴雨  
澤本無私天公豈汝憖惜爾不逢時生年巧相值荒園  
蔓草多佳植誠不易中道忽摧傷愀然起長喟遙思季

秋日燦燦黃花熾清姿出妙香玉立有幽意雖無彭澤  
詩猶能對汝醉所願竟如何精英鬱不試天道固難言  
人力或未至僮奴昨鹵莽置汝不得地偏仄玉階前愛  
汝爲汝累遂令出羣姿偃蹇同凡類有才不善養皇然  
吾深愧

題吳玉堂芙蓉臺詩鈔後

文名猶偃蹇佳句轉清新白髮嚴詩律青山放酒人豈  
無情惻愴不廢語溫醇落落成孤賞知君意未申  
裘馬多年少吾猶念此翁幽蘭在空谷衆草自春風文  
字千秋後生涯四壁中夜闌重展卷愁對短檠紅

寄林大樾亭並懷都中下第諸子

冉冉雲開宿雨收懷君獨上北山樓

樓在永定北城齊居卧龍岡之脊

名豈敢侔龍鳳

樾亭主汀之龍山講席而余在玩世時鳳山書院故戲用司馬德操語

能應馬牛經學猶親故訓傳

近有書來云著禘祫明堂等考欲以見示而余方作

毛詩說已成卷帙亦欲示樾亭

文章多是畔牢愁向人慘澹何相似應

念高堂已白頭

昨聞藥榜出南宮走馬看花意氣雄此日悲歌憐舊雨  
幾時梳洗嫁春風久知索米飢方朔况復迴車哭阮公  
杜宇鷓鴣啼自苦側身長望北來鴻

贈學博陳翁蔚圃

學舍欹斜四壁空

所居署隘僅數弓且將圯矣

頭低尚有氣如虹閉

門索句僂無已

近工吟咏不以示人

投轄畱賓憶孟公

豪於飲每招客必屬

鑰

顧我敢言天下士於君猶見古人風襟懷落落還相

賞任說逢時術未工

余來永定數月往來惟君一人

寄呈家慈

楚山迢遞已三千

謂小范家兄

子季關心更黯然老去有懷

惟子女寢中無日不團圓援琴欲鼓歸耕操藝黍難謀  
負郭田夜夜魂隨明月去月光常得到牀前

永定秋夜襟作廿首次工部秦州襍詩韻

人已都無益斯遊實浪遊行將千里路博得幾分愁  
寢

八庭閨遠涼生枕簟秋中天月色好清影爲誰留

四顧無人影淒然一瞬宮虛名如畫餅永夜但書空玉  
宇沈清露銀河度曉風牽牛與織女何事各西東

老梅根自古蟠屈入泥沙未得東風力淡藏處士家秋  
蓮何矯旆露葉各橫斜此去清霜重容顏莫浪誇

暝色城陰合孤燈獨坐時蟲聲何太苦客意得無悲宿  
鳥投林急渡山出月遲星光不及遠啞啞欲何之

刺繡貧家婦深閨十載強誰能邀一顧未肯獻微長終  
日親機杼無人典鷓鴣畫眉空對鏡自愛遠山蒼

寒鴉棲滿樹獨鶴竟安歸落落惜清影迢迢望翠微漂

搖風雨急憔悴羽毛稀且復須臾忍新松已數圍

結屋對寒山山容杳靄間風來簾自響草長戶常關獨

與書晨夕時看雲往還多情有明月不惜照愁顏

不寐披衣起空階繞百迴浮雲推月去急雨挾風來遠

道渺無信

久未得家兄信

愁懷撥不開譙樓數聲鼓今夜一何

哀

宿雨臨新霽披襟坐水亭驚魚翻浪白飛鷺破烟青樹

密猶籠月雲稀漸見星秋風吹萬里吾意在林垌

騎鶴上崑崙天高星正繁關河惟一氣山水本同源

覺餘孤枕城寒似小村空階多促織唧唧叩蓬門

山高嫌眼窄屋矮苦頭低已識生如寄何妨醉若泥管  
弦聞夜半燈火過牆西

西鄰夜多度曲

猶勝杜陵老終身聽鼓

驛

溝渠穿屈曲辛苦出山泉濟物豈無志清名未許傳汲  
常臨戶外濯亦傍溪邊又見東流去滄波何渺然

平地兩三里居人數百家四山圍縣郭一水瀉溪沙市  
晚常昂米園荒未熟瓜挑柴赤腳女猶插鬢邊花

窮達歸時命文章本性天俗儒求苟合吾道有真傳小  
築穿池沼清流引澗泉豈知滄海上波浪浩無邊

放眼乾坤內安身筆硯間寸陰猶惜日一簣未成山後



死責難已先民去不還十年徙擾擾愧見管中斑  
未知吾過寡歎息久離羣滴幔聽朝雨開門看暮雲亂  
蛙聲不息叢樹影難分意境轉蕭索何由廣見聞  
寂寥不自得懶散過時光漫作蠅鳴窹閒看蟻度牆行  
藏猶冉冉歲月已堂堂天末起清嘯悠然秋興長

生平諳作客此地苦思歸短寢愁難續寒燈焰不輝秋  
蟲終夜響霜葉滿林飛遊子衣猶薄天公莫作威

天心自仁愛吾道豈艱難好養羽毛健長收淚眼乾龍  
伸還螻屈春暖本冬寒我笑淮陰陋猶登大將壇

讀書兼養母此外復何之薪米謀諸婦歌詞寫與兒初

冬整歸棹小酌傍清池

雙駟亭爲余讀書處下  
臨方池池角有梅數株

永奉

高堂笑梅花正滿枝

### 憶昔懷人復得二十首疊前韻

行蹤遍南北海內幾交遊歷歷心中事茫茫醉後愁百  
年無故物一雨又新秋小立憐孤影淡山此滯留

夏馥逸名地高歡避暑宮

皆在河南  
林縣境內

至今春草綠回首

白雲空燕寢牽衣日龍山落帽風黃萼臺下水聞說尙

流東

去城三里爲龍頭山  
客於此黃萼山有金王庭筠讀書臺臺下有渠久

塞先君常以九日置酒會賓

田并引入署內方池

古縣黃河岸天清風捲沙再來渾似癡七載已如家

虞城

距黃河十五里余以丁丑至西園梅花晚南園竹影斜

癸未歸甲午復寓其地月餘追隨足詩酒此意亦堪誇

范氏西園城南江氏園皆先君所常遊也

風雨蘆溝夜波濤七月時驚魂如再世今日有餘悲宦

海身將老頭銜換已遲家貧官萬里躑躅欲何之

辛卯在高

陽先君病中奉檄赴密雲秋雨連月上霖下潦頻蹈危險出長新店適渾河水決急避高原水環之不食者兩日稍退余騎而渡中流浪急波湧土人引道者懼而遜時已進退不可賴馬良得力濟從騎皆溺遇救得免同濟多死者歸而先君有滇南之遷以官累不得行奔走畿輔者幾一載

行李半肩少他鄉百口強蕭蕭貧至此渺渺路何長

壬辰

七月始侍先君就道家口尚在高陽不及計也夜雨悲鴻雁秋風病驢驢沉

江舟一葉愁煞楚山蒼

至常德而家兄羈於職不能來入舟先君始得微疾

呂閣仙何處桐鄉魂不歸

癸巳正月痛罹大故鎮南西  
三十里為呂閣驛相傳純陽

嘗降  
其地

蒼茫萬事歇慟哭一身微昔日交遊盡故園音信

稀西風吹素旆杳杳出雲圍

八月始  
扶觀還

楚水復吳山崎嶇嶺谷間雁聲彭蠡澤驢背正陽關萬

里求人日三年載骨還故交驚我在拭淚認離顏

十月  
至長

沙家屬已先在未能歸也遂輕身由江西泛鄱陽湖  
長江達安徽之宣城復出浦口賃驢過正陽關至潁州  
乃歷豫返楚始奉柩  
抵里則服將闋矣

戴笠盟猶在乘槎去不回重泉無信到落月有魂來執

手驚相見愁睂尙未開疎林風響處似訴語悲哀

林太  
史香

海丙申卒於都  
中近數寢見之

不復見香海吾尤悲懋亭天寒孤影瘦雨暗一燈青癯

斷春前草愁看曙後星

太史無子一女方八歲

秋風姜被冷灑涕

望郊垞

太史之兄孝廉懋亭今歲主汀州講席

惆儻憶西崙新詩料已繁淋漓翻酒汁談笑走詞源落

葉秋山路騎驢何處村一枝棲未得回首望千門

林季廉西

崙與其兄曉樓皆以公車入都下第後未知其歸信

曉樓氣蓋世天使兩眉低又聽蕭蕭雨長歌滑滑泥虛

名終蹭蹬浪迹且東西莫作窮途哭關山靜鼓鞀

林季廉曉

樓

少梁有英氣寶匣出龍泉牛斗光同燭鱗鴻信未傳校

書芸閣夜問字玉堂邊衮衮多臺省君胡久寂然

梁庶常九

山近閣邸鈔  
知尙未受職

諸君皆卓犖聯轡入 皇家綠幙千門柳紅雲九市沙

人誰歌杖杜吾豈繫匏瓜又被春風誤愁看 上苑花

梁斯志陳壽朋郭可典  
可遠鄭建亭五季廉

觴榼羣英會鶯花二月天君家兄弟好井上草堂傳曲

磴盤雲路清池漱石泉何時重把酒拈韻小亭邊

述善述聖

介堂三  
何君

早踐清華地歸休水石間采蘭時遺母倚杖日看山江

海知鷗樂雲霄望鶴還

君親恩並重休使鬢毛斑

孟吏

部瓶

鄭子美無度陳生卓不羣文章茂秋實意度藹春雲雅

集諸賢在離情兩地分平生重益友豈獨爲多聞鄭君憲光

陳君文耀及社中諸子

家世三珠樹功名一電光永懷啟足日潑愧及肩牆寂

寂門如水淒淒殯在堂西萼今白練誰道結交長業師李賓

劉先生自海外歸需次邑令幾得而卒屬續之矣余在馬家貧一切未能如禮至今未葬

李郭同舟去翩翩何日歸江山多秀麗詞賦有光輝

店聯牀話雲衢接翼飛遙知宣室召早晚觀天威林君

崇達黃君時揚皆以茂才入貢未知廷試消息

聞道歸期近甯知見面難九原如可作雙淚豈能乾月

入空祠冷風吹旅骨寒離魂猶悵望夜夜哭仙壇

曾君爲淡

昔在滇日曾共艱難今春始歸距家二日而死於水紫  
葬治山王霸壇之側其妻先死於滇殯荒寺中今猶未  
也歸也

老去歸淮水天畱覺後知著書成一子撼樹笑羣兒大

海迴潮汐餘波及澮池十年空有志瞻望若藝枝

朱梅崖先

### 夜雨

客枕忽然覺寒牕還未明蕭蕭來急雨漠漠送殘更遠  
道書猶斷高堂寢易驚那能對長夜復此聽秋聲



晴

自從中夜醒直望到天明  
紙暗牕難白簷乾雨欲晴  
輕寒初料峭早氣更空清  
倦枕偏慵起新詩兩首成

二老詩

先大夫臨終前一日作瓶中桃花詩云千葉桃花瓶裏開  
無邊春色此中來不知萬里烏山下人醉瓊筵日幾迴  
自注謂愚谷又詹二老蓋丙戌丁亥歸田之際晨夕過從  
惟二老爲多故病中猶不忘也今先大夫棄世已六載而二老人  
尙健飯山城索處遠瞻杖履旣自傷悼又幸

老成之未喪也感而有作

林愚谷六丈

襄陽耆舊今餘幾魯殿靈光歸獨存卅載爲官歸乞米

林下十餘年閉門八旬無子卧看孫二子早喪孫青山

是處陳觴榼白髮當年好弟昆祖母林太宜人先生

內外兄弟交誼親情雙寂寞不堪倚杖更重論

林又詹三丈

少日才名獸錦袍中年宦跡蜀江皋先生前任蜀幾家

舉火依平仲性孝友而好施予萬里遺書效伯高先生敦篤

周摯在已不欺於人無忤散盡黃金餘傲骨晚來白首

卧寒曹

以家中落復出山  
改授延平教授

酒釭過處如相憶料得招魂

讀楚騷

夜大風雨

山城晴霽無三日寒雨崩騰正三更風自北來翻地軸  
河從天外瀉濤聲蟲吟嘲哢驅何處客思蕭騷爲一清  
却恐簷間作餘滴惱人不睡到天明

秋日自錄近作竟題其後

少薄詩人近學吟言中懊惱意中深長篇短律都無賴  
萬轉千回只此心霜葉何曾怨秋氣寒蟲不覺有哀音  
幾時待得東風至花滿春山鶯滿林

秋花

秋花開可愛點點破寒光  
小立近清氣微風聞暗香  
時來如有待歲晚亦何傷  
豈不愁霜露余情信自芳

昔日

爲鄭季廉  
耆仲作

昔日談詩鄭廣文  
草書小畫亦超羣  
精能未可侔三絕  
敏捷猶堪冠一軍  
耳滿狂名皆欲殺  
眼看餘子尙憐君  
卽今墓上生秋草  
一望寒山落葉紛

秋望

高樓延賞心目極  
千里道霜露洗空蒼  
乾坤氣浩浩清風  
何處來秋色不可埽  
靜見山水心閒覺  
烟雲好寒蟬

時一鳴老樹欲倒已殘池上花未歇春時草輕衫暑  
方逗暖日寒猶早好景亦難逢逍遙舒素抱

顧旭初少府惠魚及米中秋夕復招飲衙齋作

問字無人載酒稀呼童終日掩柴扉食魚我豈彈馮鉞  
授粲君猶好鄭衣聞道陔萼能潔白

少府事  
母甚孝

何妨袍笏

未可緋相知自在風塵外一笑欣然見道機

良夜沈沈數舉杯層雲破處月飛來清光萬里都如此  
素抱今宵始一開楚醴猶能安穆白梁園無可著鄒枚  
浣花溪好終歸去不向何邕覓檀栽

九日同陳蔚圃廣文登沙汀閣還至顧旭初少府

衙齋觀菊花作二首

亦知秋景好其奈客愁何  
杳杳寒山盡蕭蕭落葉多  
登臨無俗物徒倚且長歌  
却憶南昌尉歸途試一過  
把酒惜秋色殷勤祝菊花  
清香人共遠瘦影日初斜  
豈必傷遲暮猶能殿歲華  
春園三月裏桃李漫相誇

重陽後五日集陳蔚圃齋中觀菊二首

不作登高客相逢且舉杯  
雖云蕉葉量莫負菊花開  
明月又將滿秋風何處來  
朝朝畱醉眼看到嶺頭梅  
今日誠良會黃花作主人  
飽經霜雪老畱得性情真  
逸韻淡如水疎枝瘦有神  
故應數來往同未染風塵

留別陳蔚圃顧旭初吳玉堂壘前重陽韻

酒伴皆嵇阮詩人有沈何

重陽之作諸君皆有和意

亦思終歲任無

那別情多夜月淡孤影秋聲入短歌明年籬下菊猶憶  
客曾過

西風催客鬢歸棹及梅花回首龍岡路長天鳥影斜美  
人愁北渚蝴蝶寢南華剩有詩成卷空囊尙可誇

留別院中諸生壘前韻

一載論文友秋風奈別何志長憂日短德薄恨言多第  
子偕童冠江山足詠歌徒留詩卷在他日憶經過

文章原小技秋實勝春花破浪風雖壯中天日易斜詩

書爲性命醞釀出精藝努力再相見科名未足誇

疊前韻重別吳玉堂

再盡樽中酒我行君奈何故鄉翻作客

玉堂永定人相而家省城

識已無多與月論懷抱因風想寤歌蛾眉淡自愛取次  
愼經過

霜露非相苦天心愛晚花長畱枝瘦硬莫使影橫斜道  
立言爲累春淡物自華新詩知更好且勿衆中誇

雙驂亭後草

宣和御鷹歌

蔡京題字

作畫者誰宋天子題畫者誰蔡學士一德君臣筆墨中



宣和政事如斯矣牟駝岡上氛初惡鷹乎汝作乘軒鶴  
幾陣鵲鵲齊歛甲一時燕雀真巢幕五國城中淚如霰  
鷹乎汝作傳書雁杜宇難歸帝子魂鸚哥空罷君王膳  
鳳凰飛去鵠鵠來爰居蹭蹬終爲災蒼鵝出地飛已見  
白雁過江吁可哀汝不能早辨梟鸞去異族一任妖鳥  
啄金屋又不能風毛雨血灑平蕪殺盡草中兔與狐昂  
頭深目成何用濡毫孤負天恩重可知此物本尋常飢  
則依人飽則颺南朝多少官如汝死節惟聞李侍郎

雙鵞亭雪景圖一幅文衡山先生手跡也見者極  
爲欣賞因題其上

閩南終古不見雪况復春風當二月誰將尺幅挂空亭  
舉頭忽見千山白北風颼颼吹萬里亭邊草木慘欲死  
四座蕭森各苦寒不信良工技至此衡山老人寒徹骨  
冰雪胸中貯孤潔吐向溪南三百峯筆底翻空作飛屑  
遠山插入雲深處片片白光欲飛去近山逶迤折復回  
倒影寒流森可數溪流漠漠並山隈一道寒烟鎖不開  
短橋盡處茅茨出有人策蹇林中來怪石長松並奇古  
惜哉但少梅千樹却望溪南猶著鞭霜蹄踏遍瓊瑤路  
燕南雪花大如掌我昔十年驢背上敝裘破帽苦衝寒  
雖有此境無此閒今日見圖三太息此情可待成追憶

塵網勞勞愧此身豈知亦是畫中人

雙驂亭小集壽朋賦長歌依韻和之

十年萬里空奔波歲月一擲如飛梭歸來意興減都盡  
相對但覺愁顏多詩壇酒社雙寂寞舊遊回首成刹那  
諸君談鋒健猶昔舌本湧若秋決河說詩異議各蠶起  
一闕翻盡金叵羅山松澗柏固奇古清麗亦愛秋江荷  
兩賢相厄古所戒相如甯必輕廉頗陳君詩思更清絕  
面壁無語時長哦佳人絕代在空谷却笑紅粉粧娥娥  
牽蘿補屋慎自愛謠詠或恐衆女呵我今無事常閉戶  
日日洗竹兼澆莎兒童一二侍講舍說瀟或復煩維摩

有時吟咏取自適漸鏟奇險趨平和君才自是萬人敵  
於我豈啻百倍過况復餘力及藝事尤工篆隸書摹窠  
駢駢駢駢強追逐有志其若才薄何且尋酸醎愜真好  
蘆蕒豈遂非酥醅

鄭有美移居全壽朋作疊前韻

神龍未得階尺波挂壁長作陶公梭江湖雲水渺溪闊  
混混但覺魚蝦多古榕城中十萬戶乃使鄭君居不那  
頻年遷徙苦無定往來艱若殷涉河近聞數椽已暫僦  
窮巷寂寂門張羅鷓鴣一枝甯擇木靈龜千歲非巢荷  
可憐圖史數萬卷何處位置平不頗堆牀拄屋無卧處

但可徹夜立長哦齊眉僅對一椎髻侍墨豈有雙青蛾  
鄰人過酒定難必惡少騎屋誰爲呵我謂鄭君胡不山  
中結茅屋日移松竹栽菊莎下視俗子等蟣虱擾攘豈  
屑屑相摩不然扁舟浮宅五湖裏釣徒眞作張志和每  
逢山水大好處亦可輟棹相經過胡爲湫隘且近市一  
龕偏仄如鳥窠君言買山治舟苦無費有翼不能高飛  
何且就市樓賒少酒與汝小飲顏微酡

亭中草木襍興四首

東牆百竿竹矗矗參天綠西牆竹數株憔悴須人扶同  
根復同地相望甯相棄盛衰固有時厚薄人何異歲歲

拂春風春風今不同主人頻看汝却憶十年中

海棠花欲歇我見何其遲託根不得所牆角無人知飛  
紅落滿地想見全開時攀條數殘蘂俯仰有餘思佳人  
處窮巷寂寞安敢辭有美鬱不彰吾獨懷淩思

草花不知名弱枝長如帶

俗名燭臺面花

開時何爛漫點點星

光碎幽芳固難言潔白亦可愛擢秀向深叢居然洗荒  
穢小園花事歇到處芬芳艾佳人罷梳洗有時採作佩  
池西一瘦柏高高青入雲不知數百年皮作龍鱗文春  
風滿天地獨立若不聞苦心成勁節老幹餘清芬却笑  
衆花卉乘時何紛紛榮悴不足道卓哉惟此君

讀于宣遺詩疊前韻

天吳蹴踏海湧波誰爲此繡天孫梭爛斑五采溢光怪  
寸幅足寶甯貴多林君遺詩半零落十僅存五如商那  
我讀數篇歎觀止滿腹不異鰔飲河怪龍出水弄牙角  
獨鶴入雲辭網羅有時窮變造平淡濯濯楊柳田田荷  
驕驕康莊走萬里亦可屈曲盤險頗乃知君才天所縱  
可憐餘子空苦哦閉門撚鬚成數字羞澁若出閨中娥  
以斯怯膽值強伴迺遁豈復煩撓呵我昔從君如雙鳥  
晝飛共木眠共莎文章冰蘖日礪砥要使巨刃青天摩  
蒿蓬枝弱依松柏瓦釜聲細參巢和十年濛落愧知己

今欲載酒何門過  
吉光片羽燦在眼  
鳳飛不見餘舊窠  
才難豈爲一已痛  
後有作者知誰何  
思君慘愴顏色惡  
雖有旨酒無由配

襍題畫冊

昔過岳陽樓遙天一葉舟  
濛濛雲水白得似此圖不  
涼意生高樹平原長綠莎  
孫陽不可遇老去奈君何  
玉立清秋迥凡禽未許齊  
如何依富貴不惜作卑棲  
江樓馬駿丹

錦雞

嬌女不解事採蓮水中央  
弄花還顧影忽見雙鴛鴦  
銜索嗟何及微生哀此曹  
憑誰語張翰爲我訪琴高  
蓮採貫索



鯉

玉質遙相映空林交妙香還如林處士配食水仙王

梅花

水仙

### 李忠定公松風堂故址

金人十萬猛如虎鐵騎長驅入中土徽欽二帝嗟蒙塵  
高宗南作偏安主當時獨有忠定公一斥不復如冥鴻  
十事籌邊空已矣却來江上聽松風靖康一悞建炎再  
萬里長城汝自壞汪黃鼠輩不足言德遠彈章吁可怪  
孤臣忍作林泉伴北望燕雲腸欲斷定知寒食哭江干  
何異湘纍吟澤畔我來徙倚望松楸陰林風雨聲啾啾

平山駐蹕崖山戰遺恨千年想未休

觀僞閩石塔碑刻

光州鐵騎如豕突節度開門領閩越憑依山海虎一隅  
左右泉漳兔三窟鈞鵬嗣位稍凌夷紀綱毀裂自延藝  
拜官乃勒皇后貢報怨猶裂王倏尸七層疊起嵯峨石  
大小君臣紀勲績五州民力曾幾何括盡膏脂作功德  
狗尾羊頭無處著碑中列公侯將相五百人魚遊釜中燕巢幕小男  
愛女保平安碑刻中有小男愛女祈保平安之語自謂千年永歡樂豈知  
咫尺生風波佛力不奈朱連何夫妻子母駢首死富貴  
譬若浮雲過騎馬來時騎馬去對此茫茫感今古小西

湖上水晶宮芙蓉嶺下胭脂土

同人公餞朱笥河先生於張氏園亭應教分賦

翼翼京邑靈秀所都顯允夫子爲國鉅儒婆娑翰林翺

翔道衢羣士傾風如川東趨

其一

芒芒大邦惟桑與梓穆

穆伊人南國之紀

帝曰爾諧往敷多士以教以安莫

不悅喜

其二

袞衣繡裳我公其歸嗟爾庶士偃俟何依矧

余之舊十年于茲永懷明德甯不心悲

其三

我車旣巾我

馬旣秣

帝命不違載脂載輦輦之維之公毋我遏以

永今朝以慰飢渴

其四

翩翩飛蓋集於張園嘉穀在列旨

酒盈樽禮儀卒度載笑載言非無絲竹德音不謏

其五

江

山如故良遊不再更千百年豈有斯會蘭亭禊序西園  
圖繪公命詩之耀於翼代其六寒風未至旭日乍暄歸雁  
載翔潛魚在淵顧瞻光景眷戀舊恩有懷如海曷辭能  
宣其七凡百君子毋敢不敬人亦有言不克由聖愼終如  
始各守爾正公歸在朝無忘公命其八

題何述雅較獵圖

秋原草淺獸方肥百騎星馳合一圍壯士封侯何足道  
惜哉天子正垂衣

我欲安君水石間莫教容易老朱顏畫圖省識重回首  
苦憶君家大小山亡友述善述聖  
皆君羣從也

二十年前古孟諸  
珣弓寶馬獵平蕪  
而今豪氣消除盡  
矮屋低頭對此圖

小園見蝴蝶感而有作

弱質終朝困綺羅  
忙中所得亦無多  
卽今春老花將歇  
縱有芳心奈晚何

非無文采驚流輩  
未免輕狂學後生  
終被涪翁詩句誤

穿花入柳豈無情

山谷詩人見穿花入柳誰知有體無情

來何飄忽去何遲  
鎖日雙雙得意飛  
葉底也防蛛網密  
莫教羣蟻策勳歸

曾在羅浮山下見  
除非莊子寢中尋  
如何戀此閒花卉

猶作人間兒女心

題林大字小影

百年如泡影富貴亦何有樂事惟天倫聖賢幸其偶斯  
言果無愧此圖足不朽君今復何求所得良已厚末流  
易失足晚節貴堅守不寐念先人皤然雙白首

澹靜齋詩鈔卷之三終

澹靜齋詩鈔卷之四

閩中 海峯 龔景琳

小草

灘舟晚泊

山容掩靄水聲喧岸上人家半掩門坐旣不安眠又早  
思家大抵是黃昏

嚴介溪讀書處

數間茅屋樹扶疎曾記鈐山十載餘猶有詩文傳後世  
彥回真悔作中書

三月十六夜舟中寄內



惜別還如昔遙憐行道難深閨燈下淚昨夜夢中歡  
喔雞初唱匆匆語未完推篷月色好千里想同看

安陸懷古

昔日潛龍地蔥龍王氣高至今清漢水猶繞舊城濠  
禮樂庸張桂神仙奉邵陶中興偁聖主毋乃史臣褒

題林懋文囊琴小照

一曲猗蘭操何人是賞音春風遍芳草空谷有遐心  
偶爾拈花笑還聞擁鼻吟囊琴應什襲或有客相尋

又代題用前韻

囊琴歸故里未敢問知音流水高山外千秋萬古心  
祇

應花索笑時復醉行吟芳草天涯滿幽蹤何處尋

以公事至張恩堡寓孫氏園中主人頗不俗綠陰  
繞舍黃花盈砌中衛未有之勝境也終年風塵  
中得此心目豁然因成兩律

小築依山麓柴門久未開甯知騎馬客亦爲看花來繞

砌方尋句憑欄欲舉杯却愁牆外地滿目尙蒿萊

牆東爲白

馬灘稍段地自環洞之廢不得水者二十餘年今春余履任竭力設法澆灌至中四段廣武張恩二段荒蕪仍昔也茲行爲澆冬水作來歲之計修護渠工至此故云

少有詩書癖兼多山水緣一官萬里外回首十年前小

草成何事名花亦可憐

菊花雖多以種藝無法開僅如桐子大美才不得地爲之慨然

會當凌絕頂眼豁九州烟去此里許爲牛首山古叢林也明日重陽與主人約同登

### 夜宿孫氏園

數間茅屋野人家門巷陰陰靜不譁時有諸生來問字  
閒攜小吏去看花疎籬隱隱橫青嶂新月朧朧灑白沙  
良夜未須消麴蘖一詩吟就一甌茶

### 東齋襍咏

中衛無佳山水而余自去春屨任辦賑浚渠匆  
匆幾無寧晷登臨之興亦少衰矣今歲五月渠  
工告成歲將有秋萬民歡樂乃以暇日於縣署

東偏鑿池引泉累石爲山垂柳數株綠陰掩映  
時與小范大兄到三八弟暨同人輩觴咏其中  
雖爲地無幾而性情自適因時卽景錫以嘉名  
各成篇什彙曰東齋襍詠聊誌一時之趣云爾  
東齋

齋五楹南向爲余休息之所軒櫺明豁簾幕陰  
沈水光山色日徜徉心目間

東齋成小築日夕對溪山未敢誇名勝何如畫裏看

寒碧池

齋南池方長數丈稍橢其西三面環山石皆壁

立池中襍植蒲芡與岸上垂楊相映水如碧玉色

一鏡寒波靜青山倒影時何來雙乳鴨驚破碧琉璃  
夏玉泉

齋西北牆外以轆轤汲井泉疏爲小渠曲折達於池地勢處高聲如夏玉

一水來逶迤瀉落聲如注愛此玉琮琤莫問源來處  
蒙泉

池南亦有渠引井泉於數百武外伏流山下深入池中以象名之

伏流亂山中暗出深池裏脈脈不聞聲但覺波紋起

折腰橋

池偏東削木爲橋翼以扶欄自南折而西達於  
歐亭

賴汝作舟楫何爲亦折腰緣山知不遠吾欲夜吹簫

歐亭

池中小亭可容五六人落成之日適余四十初  
度同人觴余於此因憶文忠公知滁州年方四  
十自號醉翁名其瑯琊之亭其流風餘韻至今  
猶照映山谷間余何如哉

四十偁翁早廬陵亦戲題聊將記歲月豈敢謂名齊

環翠屏

環池皆山有若屏然石骨深黑插入池底其上  
時露殷紅色丹山碧水不異鼓棹九曲時也

隱几日看山羣峯翠若環似聞武夷曲却憶建溪間

蒲溪

池之東南山麓斲處滾入一曲蒲荇獨茂溪水  
盈盈不知其何往也

桃源不可尋漁父歸何晚一葉水中來彷彿胡麻飯

釣橋

跨溪有橋以甃甃之柳陰之下宜於垂釣

把釣意不在行吟過小橋凭欄一回首垂柳萬千條

不炎洞

環翠屏中峯南引一支下入於池怪石卓起接  
釣橋迤北爲洞濺十數武時露天光清幽靜默  
不寒而慄

忙時宜駐足靜處見天光任爾中心熱能教透骨涼

斜陽壁

洞口之東山凡數折皆絕壁削立下臨溪潭夕  
陽返照暮色蒼然



絕壁石蒼蒼一抹斜陽影磨崖欲銘功壯志何時逞

石門

壁之盡處有門豁然天開

羣峯從西來蹀躞勢未盡巨靈劈作門怒石猶森挺

樵徑

入石門繞斜陽壁後石磴數十級曲折而登左  
臨溪池右俯幽谷徑殊偏仄

一徑入幽處陳林伴遠行取宜日夕後歸路踏歌聲

初月臺

徑盡處有臺方丈後俯絕壁前倚高峯左右溪

谷木欄翼之玩月爲宜

高臺攬明月夜氣有餘清羣籟寂然息誰家吹笛聲

仙井

臺左有谷半方半圓似吾鄉鼇峯仙井涸已久  
矣因以其名名之

仙井何年涸丸泥久已封空餘遺跡在令我憶鼇峯

步虛路

越臺而西過仙井爲環翠屏之頂其山中虛履  
其上蓬蓬然動如扣空橐行者戰慄失措然卒  
不傾陷亦一異也西下層厓入於不炎洞之尾

山行如乘舟舉足下復上疑是骨珊珊日與雲來往

三高峯

臺前三峯聳峙中峯磅礴與西峯接其缺處有  
徑通晚眺坪復起爲東峯

三峯高崔嵬拱立如揖讓却顧來時山俯首不敢抗

晚眺坪

由初月臺登中峯缺處有地平坦周數十步俯

視城中萬家鱗次北望烟雲滅沒尤宜晚眺

綠楊隱萬家城郭參差起回頭望遠山變滅烟雲裏

戍樓

晚眺坪之東當中峯缺處短垣蔽之數武外以  
竿懸燈夜深遠望明滅巒岫間隱隱戍樓在焉  
亂山不可極遙見一燈明應念征人苦崎嶇遠道行

前村

西峯盡處其北隱見茅舍炊烟一縷時起空中  
遙天飛鳥盡暝色動黃昏一縷炊烟起前山何處村

半個塔

環翠屏西北有塔僅見其巔東直西峯

招提不可見半塔湧晴空想見溪山裏蕭蕭響暮鐘

無波舫

屏之西麓有室二楹倚山傍水軒窗洞啓彷彿  
舟居名以無波祝其安也

用拙存吾素升沈任若何已如舟不繫長願水無波

東齋襍咏同人各有和章卽景紀事綜爲長歌書  
於卷末

宦遊遠在天一涯漢之眴岑唐鳴沙風土雖殊居不陋  
傳舍何必非吾家今年况復渠水足處處春流長禾莖  
似間部屋起歡聲指日東齋成小築十幅生綃畫宸工  
懋將邱壑出胸中陳簾隱映重重樹曲檻橫開面面風  
一道清池蕩寒碧翠屏環向波中立琉璃鏡滑水晶宮

倒送斜陽上石壁。歐亭宛在水中央。夏玉泉聲落枕傍。  
更有蒙泉能暗入。折腰橋外白茫茫。淦淦蒲溪何處去。  
釣橋斜入山深處。古洞陰沈夏不炎。步虛却上青雲路。  
仙去何年仙井存。臺前初月挂黃昏。三高峯外雲飛盡。  
目極前山何處村。半塔飛來天際落。戎樓隱見孤燈爍。  
晚眺坪前望故鄉。一鳥南飛天漠漠。却尋樵徑下雲根。  
斷谷天開石作門。出險翻思平處樂。無波舫裏一開尊。  
此日賓朋高滿座。酒陣詞壇唱復和。吾家羣從更翩翩。  
角立誰甘弱。一個大蘇骯髒氣。凌人下筆森森如有神。  
小范家兄小謝閉門工索句。芙蓉出水格清新。到三沈郎初

創四聲譜

沈十二輯九

處士梅花吟更苦

林二文起

又聞伯起出

關西

楊廣文

更有小兒名德祖

廣文之子

後來尤喜孝廉船

張季

廉

三影郎中到處傳齊把新詩寫新景玉盤大小落珠

圓他年此會知難再佳話遠應傳百代即教勝迹化雲

烟猶有詩篇存梗概人物溪山二美俱今人於古定何

如龍眠居士知誰是好寫西園雅集圖

東齋坐月

初升石壁上徐到板橋頭淡淡風無力溶溶水不流閒  
看花影好靜覺鳥聲幽信美皆吾土何須訪十洲

晚眺坪北望

黑雲堆處連如山橫峯側嶺相迴環參差雉堞帶遠樹  
樓閣却在烟霞間夕陽已落猶倒影一線時露光斑斑  
長空極目渺無際忽見一鳥衝烟還當年垣塹跨萬里  
此下處處皆巖關三里一屯五里戍烽火所照天爲殷  
承平百年罷征戰頽牆幾堵高孱顏樵童牧豎出復入  
遂令雲物皆清閒今年况復富渠水桑麻四野青九九  
年豐人樂歲無事豈不感念君恩寬撫時思古頻指  
點攝衣欲下猶盤桓回頭清光照衣袂東山月出如金  
盤

七夕和小范大兄韻



萬里羈微宦三年賦別愁關山雄絕塞河漢淡初秋未  
得拋株兔何時泛斗牛閨中今夜寢曾否憶秦遊

覆水行

覆水難再收死灰不復燃結髮事君子中道相棄捐低  
頭出門去躑躅無人憐父母問所由哽噎不能宣豈敢  
怨君子所嗟命運愆却憶初結褵日夕恩纏綿托情水  
乳合指誓山海堅爲歡未浹歲世事忽變遷君甯棄管  
蒯妾自負所天桑榆收已晚瓦裂無復全願君保玉體  
頤養延天年新人來有期共咏偕老篇妾去復何言回  
頭雙淚漣

畱別中衛士民

兩載爲勞吏成功竟若何不教民事緩却畏使星多德

薄風猶梗囊空鬢已皤惟畱數渠水與汝活田禾

中衛諸渠

自高司馬士鐸後皆漸荒廢而七星渠尤甚環洞旣毀白馬灘不得水者廿餘年月日延亡殆盡余規度一載節縮諸費易以木洞復大興工役捫濬始得流通而常樂鎮靖各渠亦以漸而理今歲秋成大獲豐稔迺戶盡業皆復

心慈人不畏頗謂吏無能火烈吾何憚雷轟汝不勝劬勞驕稚子積漸屢堅冰努力觀新政休將舊貫仍

贈張錦泉

漢多隱君子我獨愛君平憐憐訓忠孝所志在民生技

游青溪詩金卷之四  
也進乎道豈以方術名世人徒耳會延請及公卿皆驚  
神術妙何異傅公明大松山蒼蒼蘆塘湖水清君其抱  
至樂拂袖歸蓬衡潛心通元化太古留希聲知音未可  
必且復陶吾情

留別靖遠士民

昔日來何遲今日去何速回首烏蘭山將行猶躑躅東  
西惟君命豈敢擇所欲匆匆志未申爲日苦不足春  
明初謁選里巷名皆熟三年望我來我來仍碌碌從懷  
衆母心未錫羣黎福軒冕對吾民膏脂慚爾祿揮鞭從  
此去何以愜幽獨霖雨今濛濛願言長秋穀

靖遠夏苦旱是日大

雨

雨後過彈箏峽

勞勞車馬負平生苦憶雙驂竹雨聲

雙驂亭爲余里舍讀書處

又向

平涼來作宰都盧山下聽彈箏

自瓦亭至平涼道中

征車永日逐溪流面面青山礙遠眸我向崆峒頂上去  
會教羣岫盡低頭

雨過六盤抵隆德

車輪輒輒度羊腸泥滑天寒路苦長漠漠白雲千嶂雨  
蕭蕭黃葉一林霜眼看秋色催人老笑問浮生爲底忙

羊牧隆城聊駐馬古來征戰幾滄桑

大雪下青嵐山

莽莽千重山茫茫一片白風雲起四際天地如不隔前途未可知努力遠行客泥濘輪無角危坡况偪仄勿徒求快意失足防傾跌安步暫俟時所求甯不得

東岡坡望蘭州城

漢縣由來古河東第一城

蘭州爲漢金城郡屬之金城縣非金城郡治也漢金城郡

治允吾在河之西距今蘭州城西一百三十餘里甘涼

如轉軸秦隴實持衡

北關心猶繫西山勢未平

華林山俯

臨城西四十六年撒拉逆回據之幾爲大患平定之後

欲包山爲城以費大中止僅於山上置五墩臺然兵

多則不能容兵少則無以守使敵人得之居高臨下勢  
若建瓴是資寇兵而齎盜糧也去歲請帑金十八萬兩  
重修外城  
仍未及此帑金糜百萬此意忍無成

### 靜甯回至平涼道中

山荒全帶磧水亂不成河一望人烟少沿途馬骨多驛

書如火急使節復星羅永夕瞻箕斗東人奈若何自皋蘭至

涇州爲東大路

### 六盤山口號

隴山自南來磅礴數百里迤邐北入河牽屯乃其尾寰宇

記引水經注謂笄頭山爲大隴山之異名史記漢書或爲雞頭而淮南子又謂之薄落山實一山也其山如太行綿亘千里故山海經謂之高山地里志安定郡涇陽并頭山在西顏注云并音苦見反又音牽此山在今靈

州東南土俗語訛謂之开屯山班志明言在涇陽而師  
古以爲靈州知此山所包甚大矣晉書北史所謂牽屯  
山卽此山也今郡縣志不載牽屯山之處然據魏刁雍  
爲薄骨律鎮將表請於牽屯山水次運漕魏之薄骨律  
爲今靈州是此山在黃河邊今中衛之南有香山特高  
大疑卽此山然則自平涼以西華亭固原諸山北達中  
衛皆岍頭山卽皆隴山也綿延數縣隨處異名大者謂  
之大隴小者謂之小隴平者謂之隴阪近世地志拘於  
涇源之說從以華亭白巖山當岍頭山岐岍頭與隴而  
二之途獨指隴州清水之山爲隴山旣多謬誤而司氏  
禹貢錐指圖乃謂大隴小隴有數處亦殊附會至於固  
原以北皆爲隴山直達黃河非賴顏氏一注參之羣書  
俱不得其解矣

六盤特一峯卓立爲西紀古不通人行羌戎塞

腹裏南道由秦鳳迢迢越隴坻

古道自陝至甘皆由鳳翔過隴坂達秦州至鞏

昌所謂山東人行役至此歌曰隴頭流北道達涼州祖

永分離四下念我行役飄然曠野是也

北道達涼州祖

馬杭一羣靖遠平番以至涼州漢武帝行幸雍遂踰隴

馬杭一羣

靖遠平番以至涼州漢武帝行幸雍遂踰隴

登崆峒西臨祖厲河而還崆峒在今平涼祖厲河今靖  
遠城第一城之苦水河光武征隗囂與竇融會於高平第  
刺史出鷁陰口鷁陰今靖遠縣治是皆其明証也宋

置隴千軍實始闢荆杞隴千軍今靜甯州後改名大戰

好水川名乃見青史好水川之戰夏人引至六盤山互亭至隆城相距

尺與咫隆德在宋為羊牧隆城其至互亭僅隔六盤一

出師乃於秦鳳繞道而此路猶不通通之自元始介弟

安西王分封設官邸元以安西王鎮開城府今固原南

甘肅四川三布避暑六盤山殿閣猶遺址天險劃然開

大道直如矢至今數百年蕩蕩為通軌 國初闢新途

更遲康莊轡舊路由牛營入山俗謂舊其後收新疆蘭



州置大吏

巡撫舊馬蘭海今移鎮大興二十六年新疆大開乃

裁巡撫移

都會集冠裳梯航通包區使者日相望喧闐

溢城市永作國西藩萬古金湯峙我來當秋末天外涼

風起茫茫九點烟浩浩山川水

六盤以東之水皆入涇以西之水皆入渭以北

之水皆入河

撫今控半壁懷古傷殘壘平生事遊覽所至考

地理山經與水志窮源必竟委作宦來邊陲匆匆甯及

此遺書已不存故老更餘幾文獻盡無徵其原蓋有以

甘肅諸志無一佳者皆由文獻無徵之故漢患羌戎之

世戰皆用武人而關西出將士著者浚谷志平涼嘖嘖

又多以武功起家毋怪文獻不足也一篇然襍引於他書

悉備美涇源不能辨者猶可考也涇水出岍頭山諸書

皆然所統甚大其泉甚多故隋唐以此地為百泉然涇源必以瓦亭川為正以水經注云涇水逕都盧山山路之內常有如彈箏之聲行者聞之鼓舞而去此見於寰宇記彈箏峽下所引者彈箏峽即今之金佛峽在瓦亭東二十里而趙志乃以萼亭之白巖山為峽頭山其水繞崕峒之前至平涼府城始合瓦亭川與水經注不合於山水皆沿草尤可訾平涼縣為漢涇陽兼有朝那而為失考矣沿草尤可訾志以為高平又以為臨涇高平乃今固原臨涇乃今涇州沿其誤者遂以高平名驛可笑也 才士尙如斯紛紛况餘

子馬上作長歌聊以備葑菲一隅略舉凡勿謂詞章俚

西鞏諸驛連讀壁間作皆清新可誦重題兩絕

晶簾玉帶句新裁青家驛句云仄徑亂橫白玉帶四山齊并水晶簾點染山川

入畫才此後邊庭春色早詩人新向隴西來

郵亭落筆太匆匆盡付蛛絲鼠跡中杯酒無緣燈影燼

顧影猶憐燈未燼忍寒  
誰贈酒盈杯原句也  
有誰愛汝碧紗籠

### 雪過車道嶺

迢迢山徑峻處處雪光明人在鏡中立車如天上行高  
容雙眼闊寒覺一身清方悔風塵裏勞勞過此生

### 甘草店病中寄內

風雪驅車夜呻吟擁被時一燈寒寂寂兩鬢影絲絲奔  
走非無僕趨承總不宜因思在家好痛癢爾能知

### 昭君詞

佳人伏處顏如玉長抱芳心媚幽獨畫師不肯畫蛾眉  
對鏡空嗟遠山綠千金無復賦長門漠漠沙塵白晝昏

一曲琵琶非訴怨  
羶裘羊酪亦君恩  
君王莫殺毛延壽  
命薄還應名不朽  
千年塚草尙青青  
六宮粉黛終何有  
却思國事在持釣  
豈獨安危妾一身  
一女飄零何足惜  
君王此後慎知人

送施雲在告養歸里

落落成何事  
飄飄剩此身  
三年乘障吏  
萬里倚門人  
菽水君恩重  
蓬蒿子舍新  
長途風雪裏  
珍重爲慈親

祀竈

竈前羅拜小兒女  
昵昵似與竈神語  
襍陳肴果進牲羞  
大半爲翁求福嘏  
乃翁素昔神所知  
鈍拙不與時相宜

轉移如可施妙術降福豈復待今茲落落浮生四十載  
昔日爲儒今作宰捉襟露肘日憂貧措大家風仍不改  
百憂况復戕其精手板朝朝効送迎一事無成空作苦  
匆匆方悔出山輕兒女之言不足聽再拜焚香親展敬  
微臣有願亦易償敢懇大神代請命不願高官與厚祿  
不願腴田與華屋公私逋累一時清但願歸山啜薄粥  
去臘蘭州病中送別雲在未盡所言茲畱平涼月  
餘始歸因疊前韻四首重贈並酬見答之作  
三年作勞吏今日得閒身宦海波中泡慈闈寢裏人老  
畱膚髮在歸趁歲華新膝下承歡處相依覺更親

二十年前事春風憶病身

戊子春余得咯血病不令就讀與雲在為酒會時

先君

陳有美昆仲林文震昆仲皆在皆與余姻婭也

青山容酒客

同人多會於林氏霽芸堂及環碧軒

環碧軒尤有山水之勝

白眼傲詩人

雲在有詩名余少年狂率每倚撫其短處或作詩相嘲誚

也回首衣冠盡

有美已作古人其兄弟皆飢驅走四方

傷心第宅新

林氏宅園

以貧故俱易新王

因君一棖觸零落感諸親

書生猶說法今現宰官身一別過三載

雲在先余一年至甘雖同官未

見面

相知有幾人徒畱心貌古却訝世情新踽踽如孤

注於君忍不親

歸去誠良計君甯為一身艱難猶有母慘澹向何人不

改青氈舊

雲在先任廣文

惟添白髮新囊空詩卷在聊以慰慈

親

內人卧病時方以公事至固原作此寄之

舟車跋涉八千里

去夏始自里中來

薪米艱難二十年久別固

應情縈縈積勞無那病纏綿帷燈影映如鈎月街鼓聲  
催欲曙天慰藉無人衾枕冷今宵可得一安眠

送別李次山

林

廣文調任昌吉

蕭蕭行李出陽關垂老猶能一據鞍 天子敷文萬里

外莫言教職是寒官

漢置西域都護唐立安西都護府西域雖入版圖然皆未嘗立學校

此國朝所以跨越前古也

燕然勒石壯心存况復先生出將門

次山為肅州總一戎鄴儒公子

路山川紀形勝漢唐事業請重論

曾在鸛陰作長官朝朝拄笏看烏蘭君歸父老如相問

爲道勞人尙苟安

次山靖遠人此行順道回籍

東齋未敢繼西園賴有龍眠畫筆存

子在中衛小築東齋頗有水木之勝

同人倡和極多予有句云龍眠居士知誰是好寫西園雅集圖彼時尙不識次山今東齋旣毀而次山爲余作圖并錄全詩裝成卷軸亦一識也他日相思重展卷斯人斯地兩銷魂

### 崢峒山北臺

雙橋裊層雲俯視但淩黑參天松萬株拔地石千尺時聞啼鳥聲不見行人迹

### 絕頂香山寺



滄海遺音卷之四  
捫蘿踏微月仄徑繞溪松憑高眺四遠一氣青濛濛森  
然不可久浩蕩來天風

自崆峒山歸聞城隍席牡丹盛開急不能待乘月  
觀之口占二首

崆峒昨見鶴飛還夜向芳園看牡丹仙鳥名花都入眼  
衝途何惜作羶官

潑紅淺碧影盈盈睡暖春濃倍有情月色朦朧香乍起  
紅紗燈下照傾城

紀二書雲月夜邀看牡丹卽席作

夜色沈沈月有陰春風細細引芳心瑤臺路遠歸何處

獨倚欄杆恨已深

漠漠輕烟密密香花枝疎處見燈光美人睡起嬌無力  
銀燭高燒照晚粧

氣味清羣色澤饒玉堂天上見風標世間富貴都如汝  
彭澤何妨一折腰

看花看到月斜時小摘花英作粉簪  
時席上以麪煎花瓣作供我道  
名花似名士豈知畫餅亦充飢

徐少府容軒將赴緩來寄示玩月撫琴小照讀自  
題詩悲其志作此應之

梧桐露濕桂花陰張翰秋風思不禁一曲歸耕彈未得

曾子思親援琴  
鼓歸耕之操

六盤南望白雲深

鳴沙別後又隆城

容軒先任中衛渠甯巡檢

捧檄還爲出塞行  
明月

關闔家萬里玉門關外聽秋聲

### 題王騰夫荷笠持經小照

溪山靜無人澹岩含空青  
時間松子落入耳清泠泠  
誰歎荷笠者行行且讀經  
蕭然若世外栩栩遊虛冥  
豈獨輕軒冕且復忘其形  
倂卧松根石閒憩松間亭  
俯仰皆自得天地亦清甯  
鳶魚活潑潑鏡月常惺惺  
嗟余羣塵網奮飛無羽翎  
何時從之遊默坐叩元扃

萼亭尉署中芍藥盛開時  
史少府奉檄外出

嬌枝獨繼牡丹開萬朵紅雲繞玉臺  
解舍荒涼花富貴  
主人何處客頻來

送別朱參軍調任吉木薩縣佐

我與君家同在閩宦遊萬里西入秦  
故鄉天末不可見  
相對猶有故鄉人君今復出玉關外  
遠度流沙臨絕塞  
平涼已隔萬重山故鄉東望知何在  
參軍之貧亦可憐  
瓶無儲粟囊無錢六載飢寒妻子怨  
終年道路僕人嫌  
塞外微官祿不薄此行且作團圓樂  
君攜眷同行一枝聊復  
棲鷦鷯滿腹何殊飽鼠雀勸君杯酒送君去  
他日君歸  
我何處涇涯綠柳不堪攀腸斷陽關三疊句

白水驛夜與程斗珠話別

白水驛中鼓聲咽聲聲似訴人離別今宵且復話須臾

明日東西各分轍交情淡淡且勿論往事淒涼不堪說

與君同是傷心人極目滇南酒鵲血

斗珠尊人隨先君赴任滇南

君見背其尊人亦謝世

回首春風二十年人事蒼茫幾銷歇都門

謁選始逢君邊塞三年又分訣垂橐而來垂橐去客意

固佳主何劣一官骭髒負良朋面冷空教心內熱君其

慎保千金軀後會何時腸百結白頭老母倚門問珍重

長途冒風雪

會甯遇廉使姚雪門先生之喪哭成四律

當代多才子先生更絕倫意長心獨苦學老氣能醇望

已傾葵夏詩從紀雨春名山藏未得傳者屬何人

先生臨危

始刻兩春軒詩草十卷著  
作尙多皆未及檢輯也

豈獨文章伯休休一个臣公平無畛域堅白不緇磷吏  
舍清如水官廚冷有塵還聞勤吐握側席待高人

手板隨羣吏高齋進長卿風塵有知己談笑若平生敢

定千秋業難忘一日情從今甘伏櫪未肯向人鳴

丁未秋冬

余兩入省垣始奉德教評詩論文清談竟日不覺身在  
宦場也永示所著詩文命其訂定及歸而先生病余亦  
因循未入省遂  
終不復見矣

廠車臨會水夾道擁靈旛老淚紛雙落遺篇忍再翻

令姪

以先生所刊雨蓬蓬風入室默默座無言太息登車去  
春軒詩草見貽蓬蓬風入室默默座無言太息登車去  
斯人不可援哭拜後同在郡伯秦蓉莊先生寓忽有旋風起於戶外移時僉謂先生之靈也四座皆唏噓而散

偶感

車塵碾旋風素衣化爲緇不知爲何事汨汨日奔馳行  
年過四十我生亦有涯富貴非所願功名不可期徒謀  
五斗米妻子猶啼飢親朋不汝諒指顧相瑕疵踟躕志  
已短奔走神爲疲故山松與菊待汝何時歸鴻鵠翔萬  
里鷦鷯棲一枝大小豈敢擇無翼焉能飛

靜甯至隆德

斜日平川一水縈  
雲山歷歷短長亭  
隴西春色今年早  
羅玉河邊柳欲青

### 六盤山

羣峯連沓接崆峒  
俯視秦關一氣中  
絕壁人隨雲下上

高山天界隴西東

山海經之高山  
即六盤是也

斜陽衰草迷殘壘

宋

夏人好水川之

古道寒烟鎖故宮

元安西王避暑宮在  
舊六盤今道康熙時

開七百年來爭戰地  
車書今見八方同

澹靜齋詩鈔卷之四終